

Кондак 1

Избранней от всех родов Божией Матери и Владычице Небеси и земли, избавляющей нас от всякия нужды, благодарственное приносим пение. Ты же, Всемилостивая Госпоже Богородице, прими наше усердное моление, сохрани нас от глада и пагубы, даруй земли нашей плодоносие, Питательнице и Спорительнице нив и хлебов наших, да радуешься всегда зовем Ти:

Радуйся, благодатная, Господь с Тобою, подаждь и нам, недостойным, росу благодати Твоей и яви милосердие Твое.

Икос 1

Ангелов Творец избра Тя, Владычице, к благодатному человек спасению, и дарова Тя, Помощницу людем, избавляющую нас от глада и всяких напастей, житие наше добре устрояющую во всяком мире и довольстве. Темже со умилением взываем Ти:

Радуйся, благодатное человек избавление от всякия нужды;

Радуйся, достоянию Твоему помощь и заступление.

Радуйся, христоролюбивыя люди от всяких бед спасающая;

Радуйся, алчущих питательнице.

Радуйся, сирых заступнице;

Радуйся, нагих одеяние.

Радуйся, израстившая нам Плод Живота;

Радуйся, Спаса рождающая душ наших.

Радуйся, благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 2

Видев Сын Твой, Богомати, великое Твое к людем милосердие, глаголет к Тебе: Проси, Мати Моя, зане не отвращаюся Тебе, но исполню вся прошения Твоя. Мы же, прославляюще сие дивное промышление о роде человеческом, вопием Богу: Аллилуиа.

Икос 2

Разум небесный даровася преподобному старцу Амвросию, настави его соорудити во обители, им созданной, икону Пресвятыя Богородицы и нареши ю "Спорительница хлебов", яко Ты, Пресвятая Дево, спасаеши люди Твоя от глада, даруеши земли плодоносие, посылаеши дождь ранний и поздний на нивы и поля наша, защищаеши люди Твоя от смертоноснаго вреда и пагубы. Тем же вопием Тебе таковая:

Радуйся, Дево, христиан похвало;

Радуйся, яко блажат Тя вси роди.

Радуйся, яко Ты благословляеши и споряеши хлебы наша;

Радуйся, яко Ты избавляеши нас от глада.

Радуйся, питающая нас хлебом жизни;

Радуйся, млеко питавшая Питателя Вселенныя.

Радуйся, Плода Безсмертнаго стяжание;

Радуйся, Садителя жизни наша рождающая.

Радуйся, благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 3

Силою свыше укрепи нас, благодатная Владычице, во дни глада и пагубы, да не погибнем люте без покаяния во унынии и

отчаянии, но утверди и настави нас в терпении и благоугождении Богу, да разумеем в напастех и скорбех волю Его святую, благую и совершенную, непрестанно хваля Бога и взывая к Нему: Аллилуиа.

Икос 3

Имея любовь велию к людям искупленным Честною Кровию Сына Твоего и Бога, Богомати Пречистая, прияла еси от Него власть устроить и покрывать род христианский. Ты бо бедствующим помощнице еси скорая, градом и весем, селам и нивам, и всему миру Покров. Тебе, Милосердной и Боголюбивой Матери нашей, устрояющей и направляющей ко спасению земную жизнь нашу, смиренномудренно глаголем:

Радуйся, Благого Сына Благая Мати;

Радуйся, непрестанно молящаяся о спасении и помиловании нас грешных.

Радуйся, о всем мире христианством к Богу Ходатаице;

Радуйся, благ всяческих Всеблагая подательнице.

Радуйся, плененных и в темницах заключенных питательнице;

Радуйся, тела моего здравие и души спасение.

Радуйся, яко рай пищный процветаеши;

Радуйся, яко пристанище душам готовиши.

Радуйся, благодатная, Господь с Тобою, подаждь и нам, недостойным, росу благодати Твоя и яви милосердие Твое.

Кондак 4

Буря противных ветров, егда найдет на нас внезапно, громы и молнии, град и вода многая устремится на землю, тогда, Госпоже Всемилостивая, ускори на помощь нам беспомощным, защити и избави нас от дождевнаго лияния, егоже сотворихомся достойни грех ради наших, и да будут поля и нивы невредимы от сих, и да не потопит нас буря водная. Тебе бо грешнии имамы заступницу непостыдную, на Тя упование наше возлагаем и, прославляюще силу молитв Твоих, Рождшемуся от Тебя Спасу мира зовем: Аллилуиа.

Икос 4

Слышаще и видяще Твое сострадание, Владычице, к бедствующим и гибнущим людям, мы грешнии прибегаем к Тебе и молимся: о, Пресвятая Дево, услыши нас грешных, и во дни, егда солнце иссушит землю и от сухости зной будет, и прозябения земная начнут увядати, тогда, Владычице, росу благодати Твоя низпосли на требующия и просящия милости, возвесели лице земли, нищих ради людей Твоих, младенцев, и скотов, и иных всех, иже чают дати им пищу во благо время, и от святых иконы Твоя "Спорительницы" яви милосердие Твое вопиющим Тебе таковая:

Радуйся, Молитвеннице неусыпающая ко Христу Богу, на милость к нам Его преклоняющая;

Радуйся, кару Божию за беззакония наша от глав наших отводящая.

Радуйся, Матерним покровом Твоим от всяких несчастий нас охраняющая;

Радуйся, поля и нивы наша от запаления солнечнаго и зноя

спасающая.

Радуйся, Всемиловитая услышательнице гласов наших
молебных в скорби и обстояниях;

Радуйся, жилища наша от огня спасающая.

Радуйся, Державная Скоропомощнице наша во дни тяжких
испытаний;

Радуйся, от всех бед быстрое избавление.

Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 5

Боготечная звездо, икона Твоя, Богомати, людем просящим
хлеба насущнаго немерцаемо сияет. Покровом бо Твоея милости
соблюдаеши поля и нивы наша и плодоносити их устрояеши,
подвизая верныя вопити Христу Богу: Аллилуиа.

Икос 5

Видя Тя Сын Твой при Кресте стоящую с возлюбленным
учеником, глаголет Тебе: Жено, се Сын Твой. И ученику: Се Мати
твоя, – всыновляя Тебе вся верующия в Него. Мы же, чада Твоя
сущия, на Твой покров надеющиеся, Тебе, яко Матери нашей,
глаголати дерзаем:

Радуйся, Судии Праведнаго умоление;

Радуйся, грехов наших прощение.

Радуйся, надеждо наша известная;

Радуйся, упование наше непостыдное.

Радуйся, скорбей наших разрешение;

Радуйся, печалей наших утоление.

Радуйся, пламене страстей изменяющая;

Радуйся, всех родов веселие.

Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 6

Проповедует Церковь Христова чудеса Твоя,
Богородительнице, от восток бо до запад хвально Имя Двое, и
несть града или страны, идеже не совершашася Тобою действие
силы Божия, во избавление и спасение, просвещение и исцеление
людей христоименитых, наипаче же чрез иконы Твоя святяя обykle
еси чудотворити, изливающи от них струи милостей и щедрот
бедствующему и требующему помощи человечеству. Сего ради
славословяще Тя, Сыну Твоему и Богу нашему вопием: Аллилуиа.

Икос 6

Возсияла еси от Истиннаго Солнца заря, Дево
Богоотроковице, просвещаеши души всех, томимых гладом
душевым, рече бо Господь: Не о хлебе едином жив будет
человек, но о всяком глаголе, исходящем из уст Божиих. Но
помрачишася очи нашии окаменеша сердца наша и не видим очима
своима и не разумеем сердцем судеб Божиих. Томимыя душевным
гладом, к Тебе прибегаем, Пречистая Дево, и просим Словом
Жизни утолить глад душевный нас, вопиющих Тебе таковая:

Радуйся, от убожества душевнаго нас воздвизающая;

Радуйся, питающая нас Словом Жизни.

Радуйся, Трапезо Пресветлая, Хлеб Жизни носившая;
Радуйся, пище, манны приемнице.
Радуйся, земле благая, Клас Божественный нарастившая;
Радуйся, ниво, растящая многоплодие щедрот.
Радуйся, камению, напоивший жаждущия жизни;
Радуйся, милость сугубо нам подающая.
Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 7

Хотящи жати спасение, яко село сладкое показалася еси Владычице, от Него же питающеся, имамы пищу вечную и нетленную. Мы же, земнии суще, молим Тя, Пречистая Дево, покажи силу Твою на жатве нив и полей наших, егда придет время их, и всяк злак да изобилует на утешение нас, поющих Богу: Аллилуиа.

Икос 7

Дивно прославилася еси, Богомати, в защищении людей православных. Возстающи на Бога не познают, коль сильна есть молитва Божией Матери. Мы же о Твоем всемогущем заступлении, помощи и благословении добре ведуще, сиче к Тебе со умилением зовем:

Радуйся, чистых руками и сердцем земледельцев
благословенными плодами венчающая;

Радуйся, бедствующим среди напастей и трудов внезапное
вспоможение.

Радуйся, безматерних сирот незримая воспитательнице;

Радуйся, помощнице всех беспомощных.

Радуйся, кормительнице вдов и сирот;

Радуйся, подающая силу, пищу и отраду болящим и
разслабленным.

Радуйся, одеждо нагих дерзновения;

Радуйся, многих согрешений прощение.

Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 8

Якоже древле содействовала еси хождению на землю Спасителя мира, сиче и ныне, яко солнце светозарное, восходиши над созревающей нивою, предшествуя приходу Господина с жателями. Тому и мы со страхом вопием: Аллилуиа.

Икос 8

Все упование наше на Тя возлагаем, Мати Божия, и в скорбех наших ко святей иконе Твоей "Спорительнице" усердно притекаем, чающе получитьи от Тебе утешение благодатное и вспоможение во оскудении и нищете нашей, взываем Ти:

Радуйся, милости превеликия сокровище;

Радуйся, пище и утешение к Тебе прибегающих.

Радуйся, хлебе неснедаемый алчущих;

Радуйся, быстрое нищих услышание.

Радуйся, скорбящих от глада и нужды приятное попечение;

Радуйся, к Свету Непреступному нас извлекающая.

Радуйся, ключу Царствия Христова;
Радуйся, надеждо благ вечных.
Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 9

Вси людие дивятся величию чудес Твоих, Пресвятая Дево,
изливаемых Тобою от святых Твоих икон, яко всем даруеши по
коемуждо прошению, устрояеши дома наша, посылавши
благословение земледельцем и даеши людям всякое довольство.
Тем же вопием Сыну Твоему: Аллилуиа.

Икос 9

Вития многовещанная не могут воспети чудес Твоих, Богомати
Владычице, яко всем концем земли простираеши руку помощи и
низпосылаеши верным земли плодоносие, благорастворение
воздухов и всякое изобилие плодов и благ земных. Мы же во
смирении своем исповедающе Твое великое заступление о нас
грешных и непрестанную помощь в нуждах наших вопием Ти:

Радуйся, достойно восхваляемая от Архангел и Ангел;
Радуйся, величаемая от всех Небесных сил.
Радуйся, Честнейшая Херувим;
Радуйся, Славнейшая без сравнения Серафим.
Радуйся, Владычице Неба и земли;
Радуйся, Родительнице Вечнаго Царя.
Радуйся, верная Рабо Господня;
Радуйся, убажжаемая на Небеси и на земли.
Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 10

Спасительное прибежище в скорбех и напастех Ты еси,
Богородице, темже испроси у Сына Твоего и Бога нашего милости
нам грешным, поющим: Аллилуиа.

Икос 10

Стено еси похваляющим чудеса Твоя, Богородице Дево, и всем
с верою притекающим и поклоняющимся Тебе и иконе Твоей
«Спорительница хлебов» именуемой и глаголющим:

Радуйся, неистощимый источниче милостей и щедрот;
Радуйся, любви Божественныя проявление.
Радуйся, чудес преславных совершение;
Радуйся, труждающихся и обремененных сладкий покое.
Радуйся, терпеливых страдальцев дарами благодатными
ущедряющая;

Радуйся, о храмах Божиих попечение имущих духовною
радостью утешающая.

Радуйся, несумненная наша надеждо;
Радуйся, тихое и доброе пристанище.
Радуйся, благодатная, Господь с Тобою, подаждь и нам,
недостойным, росу благодати Твоея и яви милосердие Твое.

Кондак 11

Пение наше не презри, Пресвятая Дево, и сокровище любве

Твоея не затвори от нас; щедрюю руку Твоея помощи простри нам, да прославляюще милости и чудеса Твоя, поем триединому Богу: Аллилуиа.

Икос 11

Светлыми лучами чудес Твоих просвещаеши весь мир христианский и заступаеши люди православныи, искупленныя Кровию Сына Твоего. Темже припадающе ко святому образу Твоему, на немже зрим Тя, Богомати, на воздусе над полями и нивами нашими, благословляющую собранныя снопы хлеба, молим Тя, Всемилостивая Владычице, род человеческий, осужденный в поте лица своего снести хлеб, в болезнях родити и в печалех питати чада своя, милостивно пощади и заступи. Даруй нам здравие и благомошие, да питаеми Тобою от силы в силу возрастати будем и вси исполнимся радости и утешения от щедродательныя десницы любви Твоея, зовуще Тебе:

Радуйся, младенцев Млекопитательнице;
Радуйся, устнами детей хвалу Богу совершающая.
Радуйся, росе неботочная в зной трудов сушим;
Радуйся, подавающая требующим благостроение.
Радуйся, уготавливающая просящим изобилие;
Радуйся, многожды прошения предваряющая.
Радуйся, печальных утешение;
Радуйся, скорбящих веселие.

Радуйся, благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 12

Благодатную помощь низпосли нам, Мати Божия, и егда изыде сеяй сеяти, да не падут семена при пути или посреде терния, или на камени, но на земли добрей. Сотвори восход их, да произрастит земля плод сторицею, и мы вси в радости сердца благодарными усты вопием Богу: Аллилуиа.

Икос 12

Поюще чудеса Твоя и милости, Владычице Богородице, хвалим Тя вси, яко воистину еси наша Помощнице, Заступнице, Питательнице и Домостроительнице, житие наше ко спасению устрояющая. Темже вопием Ти:

Радуйся, богатство нетленное нам подавающая;
Радуйся, брашно негиблющее алчущим правды.
Радуйся, питие неисчерпаемое жаждущим жизни;
Радуйся, яко рай пищный процветаеши.
Радуйся, верных спасительное прибежище;
Радуйся, покрове миру ширший облака.
Радуйся, ненадежных надеяние;
Радуйся, отчаянных спасение.

Радуйся, благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 13

О Всепетая Мати, рождающая всех святых святейшее Слово! Нынешнее наше приемши приношение, избави люди к Тебе прибегающая от всякия нужды, глада душевнаго и телеснаго,

смертоносных болезней и всякаго зла и вечныя изми муки, да с лики ангельскими непрестанно поем Богу: Аллилуиа.

Этот кондак читается трижды, затем икос 1-й и кондак 1-й.

Молитва Божией Матери ради иконы Ее «Спорительница хлебов»

Пресвятая Дево Богородице, Премилостивая Владычице, Царице Небесе и земли, всякаго дома и семейства христианскаго благоустроительнице, труждающихся благословение, нуждающихся неистощимое богатство, сирых и вдовиц и всех людей кормительнице и питательнице, рождающая Питателя Вселенныя и Спорительнице хлебов наших! Ты, Владычице, низпосылаеши Твое Матернее благословение градом нашим, селам и нивам, и коемуждо дому, на Тя упование имущему. Темже с благоговейным трепетом и сокрушенным сердцем смиренно молим Тя: буди и нам, грешным и недостойным рабом Твоим, мудрая домостроительнице, житие наше добре устрояющая. Всякий дом и семейство во благочестии и православии, единомыслии, послушании и довольстве соблюди. Нищия и неимущия пропитай, старость поддержи, младенцы воспитай, всех вразуми преискренне взывати ко Господу: Хлеб наш насущный даждь нам днесь. Сохрани, Пречистая Мати, люди Твоя от всякия нужды, болезни, глада, губительства, града, огня, от всякаго злаго обстояния и всякаго нестроения. Обители нашей, домам и семействам и всякой души христианстей и всей стране нашей исходатайствуй мир и велию милость, да славим Тя, Премилостивую Питательницу и Кормительницу нашу, ныне и присно и во веки веков. Аминь.

Тропарь Божией Матери ради иконы Ее «Спорительница хлебов»

Тропарь, глас 3:

О, Пречистая Дево Марие, Мати Царя небесе и земли, благоутробно призираеши на любящих Сына Твоего, Христа Бога нашего, и труждающихся во имя Его вечнаго ради спасения, и подаеши им вся обильно к наслаждению, Спорительнице суши хлебов им, избавляя их всякия нужды и утеснения и устрояя им, рабом Твоим сущим, избавление вечныя муки и жизнь вечную.

Кондак, глас 6:

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая, на помощь нас, верно зовущих Ти: ускори на молитву, и потщися на умоление, предстательствующи присно, Богородице, чтущих Тя.

Величание

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.

[Празднование 15/28 октября](#)